

知不足齋

江苏工学院图书馆
藏書章

記

籟紀序

陳侍中將軍祭酒新蔡王叔齊撰

夫一元上始無聲臭也二氣方坼斯喘動哉是以乾坤畫而風雷至往復定而律呂存人肖玄樞耳爲感際故聆虛器則潮震語空山則谷應蓋有形斯氣有氣斯響靡往弗充接之則有也予遭變故以來骨肉奄已漂淪氣燄頓乎消歇裸將京邑夢寐上陵旣慙瓜美青門祇哭黍離白下故雖強對妻孥都非舊態行坐臥起觸耳

成悲古人云樂一也喜者聽之喜悲者聽之悲
豈靈造之變更亦人心之遷適也爰取莊子三
籟之義嗣采史傳八風之言附諸有聲彙爲一
筴將以上循麥秀之音下攄離騷之感冀同遇
者之覽觀非敢語於中和之君子矣

籟紀

天籟凡一十四章 人籟凡一十五章

地籟凡一十三章

天籟

條風

一曰炎風起自變天方
土之蒼門從東北來

陳子聞而賦之曰噫條風之沕穆兮出萬物而
條治釋寒冰而方堅兮噓陳荳於旣死睹澌流
之汎汎兮羨方舟之南逝感羣類之有復兮哀
吾生之終否

明庶風

一曰谷風起自界天
開明之門從東方來

陳子聞而賦之曰噫谷風之習習兮明衆物而
殫出粲芳春之韶豔兮疇蘄蘄其秀麥審雨露
之有期兮懼芬華之頓息時冉冉其告嘗兮痛
皇考之不食

清明風

起自陽天波母
之門從東南來

陳子聞而賦之曰噫清明之振振兮吹萬物而
西適覽動植之向榮兮念予降於五日繫始髫
而邦之蔡兮壯齊戶而載陟曰予受命於天兮

豈公子之我失

景風

一曰凱風又曰薰風亦曰巨風起自赤天之暑門從南方來

陳子聞而賦之曰噫飄飄之景風兮鼓極陽而
斯竟惟物奮之將零兮知先業之不競何虞舜
之垂裳兮歌南薰而解乎民慍彼商均之不肖
兮歸四海於文命

涼風

起自朱天編駒之白門從西南來

陳子聞而賦之曰噫涼風之卒至兮氣沈奪而
趨悴景瑟瑟其愁予兮溥白露於唐砌憶樂遊

之嘉會兮極南州之鴻士惜異物之奄迫兮慙
一身以媚世

閶闔風

一曰盲風又曰飄風亦曰泰風
起自成天之閶闔門從西方來

陳子聞而賦之曰噫盲風之颯颯兮闔萬品於
黃泉悲草木之薶落兮感生事之暮年將憑衰
而遄隕兮見神靈之無顏聊仙桂以自佩兮掇
芳菊以爲飡

不周風

一曰麗風起自幽天
幽都之門從西北來

陳子聞而賦之曰噫肅肅之不周兮哀有生之

盡劉氣鬻發而襲予室兮塗版屋以綢繆追孩
提之宮處兮隱雙闕之廣修去傳舍之無幾兮
恣麋鹿之所遊

廣莫風

一曰寒風又曰涼風起自
天之寒門從北方來

陳子聞而賦之曰噫廣莫之蓬蓬兮負一陽而
上舒則先王之閉關兮衷紛濁其焉驅厲晏歲
之冰雪兮攬無溫之故襦閱慈母之手澤兮痛
罔極以躊躇

雷

陰陽相薄而爲
雷天地之鼓也

陳子聞而賦之曰來殷殷以疾舉兮撼坤維而
崩蕩鼓含生以長遂兮慨心壯之永降彼君子
之修省兮奉天威以寅亮惟狡童之不戒兮乃
終喪乎匕鬯

雨

陰陽相
蒸爲雨

陳子聞而賦之曰惟太陰之次畢兮乘玄雲之
祁祁衡君德之狂肅兮乃或恆而或時滅燭龍
之偉耀兮動子桑之歔歔驚南冠之長往兮爲
土偶之所嗤

霰一曰霄雪水雪雜下也雪自上下
爲溫氣所搏故曰陽之專氣爲霰

陳子聞而賦之曰漣迴霰之雜還兮遡流風而
逸起詠雨雪之遺旨兮年旣邁乎三紀慚不惑
之予遠兮毛斑斑而齟齬聊飲酒以胥會兮悼
親戚之無幾

雹霰之流也陰氣暴上雨則凝
結成雹故曰陰之專氣爲雹

陳子聞而賦之曰驅驚顏以下降兮躍冰丸以
破屋摧麤麥之方振兮殺旣坼之荏菹縣枵腹
以待哺兮峻夫告言以有蹙豈天誤予之負名

兮戒予食夫周粟

雪

水下遇寒而凝因風相襲而成雪也

陳子聞而賦之曰紛玄液之上凝兮色杲杲而返母似飛鱗之高撒兮扣霏屑於蓬牖豈焦舌之莫辨兮實病聰之所咎弛昔余之桑土兮瞻玉樹而長詬

餘溜

雨後簷溝餘瀝也

陳子聞而賦之曰瞻霖霖之霏微兮染陶瓦以驟濕瀝洪滋於方至兮繼餘潤而晚及挾鳴漏

以宵下兮和孤嫠之夜泣擊愁心之欲碎兮弄
甘焦以點滴

人籟

野哭

野哭者死喪離別
激於中而發也

陳子聞而賦之曰聲懽懽以激予兮來莫知其
誰氏鬱悲音以乍斷兮振餘傷而復起將勾踐
之去國兮抑哀姜之過市懷江南以隕涕兮壯
包胥於泉裏

聞嘆

聞嘆者聞人
之嗟嘆聲也

陳子聞而賦之曰夜蕭寂以澄予聽兮聆有喟
之嘆音知時運之多紛繆兮昧陰陽之有屈伸
置彼樞之不可奪兮俟我生之有辰欲尋聲而
遠慰兮故再三而莫禁

孤嘯

孤吹聲也又
蹙口出聲也

陳子聞而賦之曰軋喉舌之妙響兮寫清商於
天表闢流雲之旣合兮落驚禽於枝杪洵魯女
之憂懷兮動傍人之嗟悼將倚柱以循和兮爲
孰少而孰老

市譁

市譁者來城郭競市之喧囂也

陳子聞而賦之曰喧新豐之雞犬兮譁咸陽之
大賈爭魚鹽之湧集兮望繒粟而遙赴朝摩肩
以有求兮夕掉臂而不顧恐五尺之見欺兮懼
三人之多虎

村唱

村唱者村落之謳吟里巷之聲調也

陳子聞而賦之曰噫頽耀之旣匿兮紛下來之
牛羊乘籬落之煙火兮出鳴鳴之韻揚歸南山
之種豆兮起陌上之採桑痛貞良之摧損兮悲

淫佚之底亡

宵春

宵春者民家夜碓杵臼之聲也

陳子聞而賦之曰協動止於大易兮驗豐凶於象垣運長筭以宵振兮激飛輪以夜翻擣饑腸以欲絕兮驚饒夢之幻淪懷斗粟之悲歌兮怪亡人之見殘

夜織

夜織者閨中機杼之聲也

陳子聞而賦之曰有空閨之嫠婦兮畏秋衾之夜長躍奔梭以吐霧兮轉鳴軸而捲霜聲幽軋

以若訴兮見靡他之衷腸謂君子之永逝兮將
爲誰之衣裳

擣衣

擣衣者秋深
治衣之聲也

陳子聞而賦之曰陟涼飈之發發兮遞秋砧之
微微振木葉於將墜兮挾哀音而下飛摧壯遊
之行色兮怯關河之舊衣寧溝壑以自處兮無
綈袍之故知

城柝

城柝者邏卒
之柝聲也

陳子聞而賦之曰崔危堞之拂雲兮戒鳴柝之